

O Le Alofa ma le Tulafono

ELDER DALLIN H. OAKS

O Le Korama a Aposetolo e Toasefululua

E le suia le alofa o le Atua i Ana tulafono ma Ana poloaiga, ma o le malosi o le tulafono ma poloaiga a le Atua e le tuuitiitia ai le faamoemoega ma le taunuuga o Lona alofa.



Ua uunaia au ou te talanoa atu e uiga i le alofa o le Atua ma poloaiga a le Atua. O la'u savali e faapea, o le alofa aoao ma le atoatoa o le Atua o loo faaalua i faamanuiaga uma o le fuafuaga o Lana talalelei, e aofia ai le mea moni e faapea, o Ana faamanuiaga aupito taua o loo faasaosaoina mo i latou o e usitai i Ana tulafono.¹ O mataupu faavae nei e faavavau e tatau ona talalaina ai matua i lo latou alolofa ma le aoaoina o a latou fanau.

I. Ou te amata atu i ni faataitaiga se fa, lea e faaalua ai nisi o manatu lē

mautonu o le lalolagi i le va o le alofa ma le tulafono.

- E ta'u atu e se talavou matua o loo nonofo faapouliuli ma se paaga, i ona matua loto tiga, "Afai lua te alolofa ia te au, e tatau ona oulua taliaina au ma la'u paaga e pei lava ona oulua taliaina la oulua fanau ua faaipoipo."
- E tali atu se talavou i faatonuga po o uunaiga a matua e ala i le faapea atu, "A na e alofa ia te a'u, e te le tuu poloaiina a'u."

I nei faataitaiga, o se tagata e solia se poloaiga e faapea mai e tatau ona sili atu le alofa faamatua i poloaiga o tulafono faalelagi ma aoaoga a matua.

O isi faataitaiga nei e lua ua faaalua ai le le mautonu o le lalolagi i le taunuuga o le alofa o le Atua.

- E teena e se tagata le aoaoga faavae, e tatau i se ulugalii ona faaipoipoina mo le faavavau e olioli ai i mafutaga faaleaiga i le olaga a sau, i le faapea mai, "Afai e alofa moni le Atua ia i tatou, ou te le talitonu na te tuueseeseina tane ma ava i se faiga faapenei."
- Fai mai se isi tagata ua faamutaina lona faatuatua ona o puapuaga ua faatagaina e le Atua e oo i se tagata

po o se atunuu, ma manatu ai, "Afai e i ai se Atua e alofa ia i tatou Na te le faatagaina lenei mea e tupu."

O nei tagata e le talitonu i tulafono e faavavau aua ua feteenai o laua manatu e uiga i taunuuga o le alofa o le Atua. O tagata o ē faia nei tulaga ua le malamalama i le natura o le alofa o le Atua po o le faamoemoega o Ana tulafono ma poloaiga. E le suia le alofa o le Atua i Ana tulafono ma Ana poloaiga, ma o le malosi o le tulafono ma poloaiga a le Atua e le tuuitiitia ai le faamoemoega ma le taunuuga o Lona alofa. E tatau foi ona tutusa lava ma le alofa ma tulafono faamātua.

II.

Muamua, mafaufau i le alofa o le Atua, lea na matua faamatala auiliili e Peresitene Dieter F. Uchtdorf. Na fesili le Aposetolo o Paulo, "O ai se na te faateaseina mai i tatou i le alofa o Keriso?" E le o puapuaga; e le o sauaga; e le o le pagatia po o le pelu (tagai Roma 8:35). "Ua ou mautinoa," na ia fai mai ai, "e le mafaia e le oti, po o le ola, po o agelu, po o alii, po o e malolosi, po o se tasi mea na faia, e le mafaia e ia mea ona faateaseina mai i tatou i le alofa o le Atua" (fuaiupu e 38–39).

E leai se isi faamaoniga e sili atu o le mana e lē iu ma le atoatoa o le alofa o le Atua, nai lo lea na tautino mai e le Aposetolo o Ioane: "Aua ua faapea lava ona alofa mai o le Atua i le lalolagi ua ia aumai ai lona Atalii e toatasi" (Ioane 3:16). Na tusia e le isi Aposetolo o le Atua "na le faasaoina lona lava Alo, a ua tuuina mai o ia e sui ai i tatou uma" (Roma 8:32). Sei mafaufau la i le tiga na oo i lo tatou Tama Faalelagi i le auina mai o Lona Alo e onosaia puapuaga e le mafaamatalaina mo a tatou agasala. O le faamaoniga silisili lena o Lona alofa mo i tatou taitoatasi!

O le alofa o le Atua mo Ana fanau o se mea moni e faavavau, ae aisea ua alofa tele mai ai o Ia ia i tatou, ae aisea



foi tatou te naunau ai i lena alofa? O loo maua le tali i le sootaga i le va o le alofa o le Atua ma Ana tulafono.

O nisi e foliga mai e faatauaina le alofa o le Atua ona o lo latou faamoe-moe e faapea, e matua maoae ma e le faatuaoia Lona alofa, o le a faataga ai ma le alofa mutimutivale i latou e lē usitaia Ana tulafono. I se faatusatusaga, o i latou o e malamalama i le fuafuga a le Atua mo Lana fanau, e iloa o tulafono a le Atua e le masuia, ma o le isi lea faamaoniga sili o Lona alofa i Ana fanau. E le mafai e le alofa ona fāoa le faamasinoga tonu², o i latou foi e mauaina le alofa mutimutivale, “o i latou ua tausia le feagaiga ma ususita-’i i le poloaiga” (MFF 54:6).

Tatou saga faitau atili i le Tusi Paia ma tusitusiga paia i aso nei e uiga i le “lē fiafia” o le Atua i e amioleaga³ ma le faaoo ifo o Lona “toasa”⁴ ia i latou o e na solia Ana tulafono. E faapefea ona avea le lē fiafia ma le toasa ma faamaoniga o Lona alofa? Na aoao mai e Iosefa Samita, e faapea “na faatulagina [e le Atua] ni tulafono e mafai ai e le toatele ona maua le avanoa e alualu ai i luma e pei o Ia lava.”⁵ O le alofa o le Atua e matuai atoatoa ma o lea Na te manaomia ai ma le alofa i tatou, ia usitai i Ana poloaiga aua ua Ia silafia, e na o le pau lea o le ala e mafai ai e tulafono na Ia tuuina mai ma le alofa

ona suia i tatou i *le ituaiaga tagata e mafai ona avea ai* i tatou—ia atoatoa e pei o Ia. O le mafuaaga lea, e le avea ai le le fiafia o le Atua ma Lona toasa o se *feteenaiga* o Lona alofa ae o se *faamaoniga* o Lona alofa. Ua iloa e matua uma e mafai ona matuai atoatoa lou alofa i se tamaitiiti ae o loo e ita pea ma faanoanoa i le amio toilalo a lena lava tamaitiiti.

O le alofa o le Atua e matuai laugataasia, lea e tuuina mai ai e Lana fuafuga atoatoa le tele o meaalofa i luga o Ana fanau uma, e oo foi ia i latou o e le usitaia Ana tulafono. O le ola faitino o se tasi lea o na meaalofa, ua tuuina mai i tagata uma o e na agavaa i le Tāua i le Lagi.⁶ O le isi meaalofa e le faatuaoia o le toetutu o tagata uma, “Aua faapei ona oti uma ia Atamu, e faapea foi ona faaolaina uma ia Keriso” (1 Korinito 15:22). E tele meaalofa faaletino [ua tatou maua] e le o faalagolago i lo tatou ususitai patino i tulafono. E pei ona aoao mai Iesu, e “faaoso [e lo tatou Tāma Faalelagi] lona la i e ua amio leaga ato ma e ua amio lelei, ua ia faatoto ifo foi le ua i e ua amiotonu ato ma e ua amiole-tonu” (Mataio 5:45).

Maimau pe a na faapea o le a tatou faalogo, ona tatou iloa lea ma lagona le alofa o le Atua, e tusa lava pe tatou te lē o ususitai. Na tuuina mai e se

tamaitai e le’i leva ona toe toaga mai i le Ekalesia le faamatalaga lenei i se tautalaga i le sauniga faamanatuga: “Na i ai lava o Ia i taimi uma iina mo au, e ui lava ina ou teenaina o Ia. Na ia taialaina au e le aunoa ma faamafanafana ia te au i Lona alofa tunoa na sio-mia ai au, ae [sa] tele lo’u ita na le mafai ai ona ou iloa ma talia mea na tutupu ma lagona faapena.”⁷

III.

O faamanuiaga aupito taua a le Atua e mautinoa lava le faalagolago i le ususitai i tulafono ma poloaiga a le Atua. O le aoaoga autu e mai le faaaliga o aso nei:

“O loo i ai le tulafono, na faavaeina e le matatalaina i le lagi a o lei faavaeina lenei lalolagi, e autu ai faamanuiaga uma lava—

“Pe a tatou maua foi soo se faamanuiaga mai le Atua, e maua ai i le ususitai i le tulafono lea e autu ai” (MFF 130:20–21).

O lenei mataupu faavae maoae e fesoasoani tatou te malamalama ai i le *mafuaaga* o le tele o mea, e pei o le faamasinoga tonu ma le alofa tunoa e faapaleniina e le Togiola. O loo faamalalamaina ai le pogai o le a le taofia ai e le Atua le faaogaina o le faitalia e Lana fanau. O le faitalia—o lo tatou mana e filifili ai—e taua i le fuafuga o

le talalelei lea ua tatou o mai ai i le lalolagi. E le faalavelave le Atua i le taofia o taunuuga o filifiliga a isi tagata ina ia mafai ona puipuia ai le ola solo lelei o isi tagata—e tusa lava pe latou te fasiotia, faamanualia pe saua i le tasi ma le isi—aua o le a faaleagaina ai Lana fuafuaga mo lo tatou alualu i luma e faavavau.⁸ O le a Ia faamanuaina i tatou ia onosaia taunuuga o filifiliga a isi tagata, ae o le a Ia le taofia na filifiliga.⁹

Afai e malamalama se tagata i aoaoga a Iesu, e le mafai e lena tagata ona faapea mai, e talitonu lo tatou Tama Faalelagi alofa po o Lona Alo paia e suia e lo La'ua alofa a La'ua poloaiga. Mafaufau i faaitaiga nei.

Ina ua amata e Iesu Lana galuega, o Lana savali muamua lava o le salamo (Mataio 4:17).¹⁰

Ina ua Ia faaalua le alofa mutimutivale i lona le tausalaina o le fafine na molia atu i le mulilua, peitai sa Ia fetalai atu ia te ia “Alu ia oe, aua e te toe agasala” (Ioane 8:11).

Na aoao mai Iesu: “E le sao atu i le malo o le lagi i latou uma o e fai mai ia te au, Le Alii e, le Alii e; na o le na te faia le finagalo o lou Tama o i le lagi” (Mataio 7:21).

O taunuuga o poloaiga ma tulafono a le Atua e le suia ina ia fetai ma amioga po o manaoga masani. Afai e i ai se tasi e manatu o le alofa faaleatua pe faamatua i se tasi, e tuuina atu ai i se tasi le faatagaga e le usitaia ai le tulafono, latou te le o malamalama i le alofa po o le tulafono. Ua tautino mai e le Alii: “O sē solia se tulafono ma lē faia e tusa ma le tulafono, a e saili ia avea ma tulafono ia te ia lava, ma loto e nofo i le agasala, ma nofo lava i le agasala, e le mafai ona faapaiaina e le tulafono, po o le alofa tunoa, agatonu, po o le faamasinoga. O lea, e ao ina latou tumau pea i le eleelea” (MFF 88:35).

Ua tatou faitau i faaaliga i ona po nei, “O malo uma lava foi e tuuina atu i ai le tulafono” (MFF 88:36). Mo se faaitaiga:

“Aua o lē le mafai ona tausia le tulafono a se malo selesitila e le mafai foi ona nofo i se mamalu selesitila.

“O lē le mafai ona tausia foi le tulafono a se malo terasitila e le mafai foi ona nofo i se mamalu terasitila.

“O lē le mafai ona tausia le tulafono a se malo telesitila e le mafai foi ona nofo i se mamalu telesitila” (MFF 88:22–24).

I se isi faaupuga, o le malo o le mamalu e tofia i ai i tatou i le Faamasinoga Mulimuli e le iloiloaina i le alofa, ae o le tulafono ua tuuina mai e le Atua i Lana fuafuaga e agavaa ai i tatou mo le ola faavavau, “o le mea alofa sili lea i lo meaalofa uma a le Atua” (MFF 14:7).

IV.

Ua i ai i matua le tele o avanoa e faaaoaga ai nei mataupu faavae i le aoaoina ma le tali atu ia latou fanau. O se tasi o na avanoa e faatatau i meaalofa e tuuina atu e matua i a latou fanau. E pei foi ona tuuina mai e le Atua nisi o meaalofa i Ana fanau uma i le olaga nei e aunoa ma le manaomia o lo latou usiusitai patino i Ana tulafono, ua tuuina atu foi e matua le tele o faamanuiaga e pei o fale ma meaai, e tusa lava pe le o atoatoa le fiafia o a latou fanau i tulaga uma e manaomia e matua. Ae, o le mulimuli i faaitaiga a se Tama Faalelagi e sili ona poto ma alofa, o lē ua tuuina mai tulafono ma poloaiga mo le manuia o Lana fanau, o matua atamamai latou te tuuina atu nisi o meaalofa faamatua i luga o le usiusitai.

Afai e i ai se tamaitiiti faalogogata a ni matua—e pei o se talavou ua matele i le tagofia o le ava malosi po o fualaa oona—latou te fetai ma se fesili ogaoga. Pe tatau i le alofa faamatua ona faatagaina nei mea oona po o le faaogaina o nei mea oona i totonu o le aiga, pe manaomia e tulafono faalemalo po o le ogaoga o nei amioga po o le manuia o isi tamaiti i totonu o le aiga lea e tatau ai le faasaina o nei mea?

Ina ia tuuina atu se fesili e sili atu le ogaoga, afai o i ai se tamaitiiti matua o nonofo faapouliuli ma se paaga, pe tatau ona lagona e lenei tamaitiiti le mamafa o le le taliaina o le ogaoga o aga o feusuaiga i fafo atu o le lio o le faaipoipoga e ala i le faatoina o ia mai soo se fesootaiga ma le aiga, pe manaomia e le alofa faamatua ia aua le amanaia le mea moni e faapea o loo faapouliuli? Ua ou vaai i nei mea matuia uma, ma ou te talitonu e le o ni mea talafeagai uma lava.

O le a se fofo e tatau ona tuuina atu e matua? O le mataupu lenei e faatatau i le poto faalematua, e taiaina e musumusuga a le Alii. E leai se vaega o le tali atu a matua e sili atu ona manaomia ai le taitaiga faalelagi pe sili atu ona maua ai nai lo filifiliga a matua i le tausiga o a latou fanau ma le taitaiga o o latou aiga. O le galuega lenei o le faavavau.

A o tauivi matua ma nei faafitauli, e tatau ona latou manatua le aoaoga a le Alii e tuu le ivasefulu ma le iva ae o atu i le vao e laveai mai le mamoe ua leiloa.¹¹ Ua valaa atu Peresitene Thomas S. Monson mo “se misiona o le alofa e laveai mai ai . . . o tatou uso ma tuafafine o loo taase i le vao o le faatalale po o le valea.”¹² O nei aoaoga e manaomia ai le popole alofa faifai pea, lea e mautinoa lava le manaomia ai o fegalegaleaiga alofa e le aunoa.

E tatau foi i matua ona manatua le aoaoga masani a le Alii “o le ua alofagia e le Alii, ua aoai atu o ia ia te ia (Eperu 12:6).¹³ I lana saunoaga i le konafesi e faatatau i le “faapalepale ma le alofa,” na aoao mai ai Elder Nelson e faapea “o le alofa moni i le tagata agasala e mafai ona faamalosalia ai feupuaiga lotototoa—ae le o le gauai i ai! O le alofa moni e le lagolagoina amioga e faatafun[a] ai le tagata lava ia.”¹⁴

Po o fea lava ua tosi ai le laina i le va o le malosi o le alofa ma le malosiga o le tulafono, o le solia o poloaiga e mautinoa lava e aafia ai mafutaga alofa faaleaiga. Na aoao mai Iesu:

“Fa te outou ea ou te sau e avatu le filemu i le lalolagi? Ou te fai atu ia te outou, e leai; a o le fevaevaei:

“Aua e amata i nei ona po e i ai i le fale e tasi tagata e toalima e fevaevaei i latou, o le toatolu e faamasesei ma le toalua, o le toalua foi e faamasesei ma le toatolu.

“E fevaevaei le tamā ma le atalii, o le atalii foi ma le tamā; o le tina ma le tama teine, o le tama teine foi ma le tina” (Luka 12:51–53).

O leni aoaoga o’oo’o ua faamanatu mai ai ia i tatou, a lē lotogatasi tagata o le aiga i le taumafai lea e tasi poloaiga a le Atua, o le a i ai le fevaevaei. Tatou te faia mea uma e mafai ona tatou faia e aloese ai mai le faaleagaina o mafutaga alofa, ae o nisi taimi e tupu lava e ui i mea uma tatou te faia.

I le totonugalemu o atuatuvalega faapena, e tatau lava ona tatou onosaia le mea moni e faapea, o le sē ese o e pele ia i tatou o le a faaititia ai lo tatou fiafia, ae e le tatau ona faaititia ai lo tatou alolofa o le tasi i le isi, po o a tatou taumafaiga ma le onosai ia fusia faatasi i le malamalama i le alofa o le Atua ma tulafono a le Atua.

Ou te molimau atu i le moni o nei mea, o se vaega o le ata o le faaolataga ma o aoaoga faavae a Keriso, o lē ou te molimau atu ai i le suafa o Iesu Keriso, amene. ■

FAAMATALAGA

1. Tagai Russell M. Nelson, “Divine Love,” *Liabona*, Feb. 2003, 12.
2. Tagai Alema 42:25.
3. Tagai, mo se faaitaiga, Faamasino 2:12–14; Salamo 7:11; MFF 5:8; 63:32.
4. Tagai, mo se faaitaiga, 2 Tupu 23:26–27; Efeso 5:6; 1 Nifae 22:16–17; Alema 12:35–36; MFF 84:24.
5. *Aoaoga a Peresitene o le Ekalesia: Iosefa Samita* (2007), 210.
6. Tagai Faaaliga 12:7–8.
7. Tusi i le 6 Tes., 2005, teuina e le tusitala.
8. Faatusa i le Alema 42:8.
9. Faatusa i le Mosaea 24:14–15.
10. Tagai Mataio 4:17.
11. Tagai Luka 15:3–7.
12. Tagai Thomas S. Monson, “Autau Leiloloa,” *Liabona*, Set. 1987, 3.
13. Tagai foi Faataoto 3:12; Faaaliga 3:19; MFF 95:1.
14. Russell M. Nelson, “Aoa Mai i Matou i le Faapalepale ma le Alofa,” *Ensign*, May 1994, 71.